

Ո Ր Ո Շ ՈՒ Մ N06/6
/վարչական տույժ նշանակելու մասին/

«11» հունվարի 2019թ.

ք. Վանաձոր

Հայաստանի Հանրապետության պետական եկամուտների կոմիտեի Արևելյան մաքսատուն-վարչության պետ Արմեն Գրիգորյանս, քննելով Խաչատուր Չարչյանի /անձն. 17AA51630, քաղաքացիություն՝ Վրաստանի Հանրապետության/ կողմից մաքսային կանոնների խախտման վերաբերյալ գործը,

Պ Ա Ր Զ Ե Ց Ի

Վրաստանի քաղաքացի Խաչատուր Չարչյանի անվամբ 22.10.2018 թվականի թիվ 19978 տրանսպորտային միջոցի մաքսային հայտարարագրով «Ժամանակավոր ներմուծում» մաքսային ընթացակարգով 30 օր ժամկետով ՀՀ տարածք է ներմուծվել VOLVO մակնիշի, GW050GE պետհամարանիշի, 2009 թվականի արտադրության տրանսպորտային միջոց և LECITRAILER RC2EDPSP մակնիշի, GW050G պետհամարանիշի, 2004 թվականի արտադրության կցորդ: Նշված տրանսպորտային միջոցին կցորդի ժամանակավոր ներմուծման վերջնաժամկետը սահմանվել է մինչև 19.10.2018 թվականը, սակայն մինչ այդ ժամկետի ավարտը վերոնշյալ տրանսպորտային միջոցը և կցորդը չեն արտահանվել ՀՀ տարածքից, որի արդյունքում խախտվել է հետադարձ արտահանման պարտավորությունը:

ՀՀ ՊԵԿ Արևելյան մաքսատուն-վարչության Բազրատաշենի մաքսային կետ-բաժնի ավագ մաքսային տեսուչ-իրավաբանի կողմից 13.12.2018 թվականին Խաչատուր Չարչյանի նկատմամբ կազմվել է մաքսային կանոնների խախտման վերաբերյալ արձանագրություն ՀՀ մաքսային օրենսգրքի 199-րդ հոդվածի 1-ին մասի հատկանիշներով:

Մաքսային կանոնների խախտման վերաբերյալ վարչական վարույթի շրջանակներում հարցում է կատարվել ՀՀ ՊԵԿ Ներքին անվտանգության վարչություն՝ տրանսպորտային միջոցի սահմանահատումների վերաբերյալ տեղեկատվություն ստանալու նպատակով: Պատասխան գրությունից պարզվել է, որ VOLVO մակնիշի, GW050GE պետհամարանիշի, 2009 թվականի արտադրության տրանսպորտային միջոցը և LECITRAILER RC2EDPSP մակնիշի, GW050G պետհամարանիշի, 2004 թվականի արտադրության կցորդ 22.10.2018 թվականին Բազրատաշենի մաքսային կետ-բաժնով ներմուծվել է ՀՀ, սակայն հետագա արտահանման պարտավորությունը չի կատարվել:

Վրաստանի քաղաքացի Խաչատուր Չարչյանը 03.12.2018թ. դիմում է ներկայացրել ՀՀ ՊԵԿ, որով նա հայտնում է, որ 22.10.2018 թվականին 19978 տրանսպորտային միջոցի հայտարարագրով ժամանակավոր ՀՀ տարածք է ներմուծել VOLVO մակնիշի, GW050GE/GW050G պետհամարանիշի բեռնատար ավտոմեքենա, որը տեղափոխել է «ԱՍԷԴԼ» ՍՊԸ-ին պատկանող բեռը: Քանի որ բեռի փաստաթղթերում առկա են եղել թերություններ, ուստի գործն ուղարկվել է հետաքննության վարչություն, իսկ բեռը և տրանսպորտային միջոցը կայանվել է «Հայկ» մաքսային պահեստում: Մինչույն ժամանակ Խաչատուր Չարչյանը խնդրել է 22.10.2018 թվականի թիվ 19978 տրանսպորտային միջոցի հայտարարագրի ժամանակավոր ներմուծման ժամկետը երկարաձգել ևս 60 օրով և չկիրառել տույժեր և տուգանքներ ժամանակավոր ներմուծման ժամկետը խախտելու համար:

Գործի քննության շրջանակներում 21.12.2018թ. թիվ 22.1.1/1893706-18 գրությամբ հարցում է կատարվել ՀՀ ՊԵԿ Արարատյան մաքսատուն-վարչություն Խաչատուր Չարչյանի կողմից ներմուծված «VOLVO» մակնիշի GW050GE/GW050G պետհամարանիշի բեռնատար ավտոմեքենան արդյոք կայանված է եղել «Հայկ» մաքսային պահեստում և որ ժամանակահատվածում:

Պատասխան գրությամբ հայտնել են, որ «VOLVO» մակնիշի GW050GE/GW050G պետհամարանիշով բեռնատար ավտոմեքենայի բեռնատար-քարշակը՝ GW050GE հաշվառման համարանիշով, կայանված է եղել «Հայկ» մաքսային հսկողության տարածքում 22.10.18թ մինչև 23.10.18թ., իսկ վերը նշված ավտոմեքենայի GW050G հաշվառման համարանիշի կցորդը 22.10.18թ.-ից մինչև 04.12.18թ.-ը:

Նշանակվել է գործի քննություն 11.01.2019 թվականին ժամը 15:00-ին, վերջինս պատշաճ ծանուցվել է, սակայն չի ներկայացել գործի քննությանը:

«VOLVO» մակնիշի GW050GE պետհամարանիշի, 2009 թվականի արտադրության տրանսպորտային միջոցի մաքսային արժեքը կազմում է 7955968 ՀՀ դրամ, որի «Բաց թողնում՝ ներքին սպառման համար» մաքսային ընթացակարգով հայտարարագրման դեպքում կառաջանան մաքսային վճարներ՝ մաքսատուրք՝ 7125106 ՀՀ դրամ, ԱԱՀ՝ 3020446, մաքսավճար՝ 12800 ՀՀ դրամի չափով:

ՀՀ մաքսային օրենսգրքի 189-րդ հոդվածի 1-ին մասի համաձայն՝ մաքսային կանոնների խախտում է համարվում անձի կողմից կատարված անօրինական

գործողությունը կամ անգործությունն, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով Հայաստանի Հանրապետության մաքսային սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենսգրքով նախատեսված է պատասխանատվություն:

Նույն հոդվածի 2-րդ մասի համաձայն՝ ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության:

ՀՀ մաքսային օրենսգրքի 199-րդ հոդվածի 1-ին մասի համաձայն՝ հետագա արտահանման պարտավորությամբ Հայաստանի Հանրապետություն ներմուծված ապրանքները և տրանսպորտային միջոցները սահմանված ժամկետում չարտահանելը կամ հետագա ներմուծման պարտավորությամբ արտահանված ապրանքները և տրանսպորտային միջոցները սահմանված ժամկետում Հայաստանի Հանրապետություն չներմուծելը՝ առաջացնում է տուգանքի նշանակում՝ խախտման օրվա դրությամբ այդ ապրանքների և տրանսպորտային միջոցների համար «ներմուծում՝ ազատ շրջանառության համար» մաքսային ռեժիմով նախատեսված մաքսային վճարների մեծության 50 տոկոսի չափով, բայց ոչ պակաս, քան 50 հազար դրամ:

Սույն դեպքով հաջատուր Չարչյանի անվամբ 22.10.2018 թվականի թիվ 19978 տրանսպորտային միջոցի մաքսային հայտարարագրով «Ժամանակավոր ներմուծում» մաքսային ընթացակարգով 30 օր ժամկետով ՀՀ տարածք է ներմուծվել VOLVO մակնիշի, GW050GE պետհամարանիշի, 2009 թվականի արտադրության տրանսպորտային միջոց, որի ժակետը ավարտվել է 19.11.2018թ. իսկ LECITRAILER RC2EDPSP մակնիշի, GW050G պետհամարանիշի, 2004 թվականի արտադրության կցորդի ժակետը կասեցվել է «Հայկ» մաքսային հսկողության տարածքում գտնվելու ժամանակահատվածում:

Խաջատուր Չարչյանը սահմանված ժամկետում չի դիմել մաքսային մարմիններին վերոնշյալ քարշակի ժամանակավոր ներմուծման ժամկետը երկարաձգելու խնդրանքով:

Այսպիսով վարչական մարմինը քննելով գործում առկա ապացույցները գտնում է, որ «VOLVO» մակնիշի GW050GE/GW050G պետհամարանիշի բեռնատար ավտոմեքենայի բեռնատար-քարշակի հետագա արտահանման պարտավորությունը չկատարման համար

Խաչատուր Չարչյանի արարքում առկա է ՀՀ մաքսային օրենսգրքի 199-րդ հոդվածով նախատեսված մաքսային կանոնների խախտման հատկանիշներ:

Ելնելով վերոգրյալից և ղեկավարվելով ՀՀ մաքսային օրենսգրքի 221 հոդվածով և Վարչական իրավախախտումների վերաբերյալ ՀՀ օրենսգրքի 214-րդ, 234-րդ և 247-րդ հոդվածի 1-ին մասով՝

Ո Ր Ո Շ Ե Ց Ի

1. ՀՀ մաքսային օրենսգրքի 199-րդ հոդվածով նախատեսված մաքսային կանոնների խախտում կատարելու համար Վրաստանի քաղաքացի՝ Խաչատուր Չարչյանին ենթարկել վարչական պատասխանատվության՝ տուգանելով 5079176 ՀՀ դրամի չափով:
2. LECITRAILER RC2EDPSP մակնիշի, GW050G պետհամարանիշի, 2004 թվականի արտադրության կցորդի վերաբերյալ վարչական գործի վարույթը կարճել՝ իրավախախտման կազմի բացակայության պատճառաբանությամբ:
3. Որոշման մասին հայտնել Խաչատուր Չարչյանին:
4. Պարզաբանել, որ որոշումը ՀՀ մաքսային օրենսգրքի 222-րդ հոդվածի համաձայն 10-օրյա ժամկետում կարող է բողոքարկվել վերադաս մաքսային մարմին կամ ՀՀ վարչական դատավարության օրենսգրքով սահմանված կարգով՝ վարչական դատարան:

Սույն որոշմամբ նշանակված փուլանքի վճարման հաշվեհամարներն են. 900005024055՝ գումարի 70% և 900233586016՝ գումարի 30% (ՀՀ պետական բյուջե, կենտրոնական գանձապետարան, Արեվելյան մաքսավորուն-վարչություն, ԿՈԴ 29):

ԱՐԵՎԵԼՅԱՆ ՄԱՔՍԱՏՈՒՆ-

ՎԱՐՉՈՒԹՅԱՆ ՊԵՏ



Ա. ԳՐԻԳՈՐՅԱՆ